

困學紀聞補註

困學紀聞補注卷九

清鄞張嘉祿自葺簪

男壽鏞校刊

天道

關苞授規日月星辰之象集證或曰關苞受河圖篇名

案關苞受蓋河圖篇名授與受通見錢氏十駕齋

養新錄卷十七

沈約宋志五星聚者有三案安祿山反天寶九年五

星聚箕尾李鄴侯家傳謂肅宗復長安其年五星

亦聚東井唐史未載 敬齋古今藪卷四五星聚非
吉祥乃兵象故高祖入關五星聚於東井則爲秦亡
之應攷之書傳五星之聚不獨漢世有之在唐世爲
尤多武德元年七月鎮星太白辰星聚於東井二年
三月復然是年關中分裂天寶九載八月五星聚於
箕尾燕分也占曰無德則殃至德二載四月歲星熒
惑太白辰星聚於鶉首元和十年六月四星復合於
東井皆占中外相連以兵乾元元年四月熒惑鎮星
太白聚於營室太史南宮沛奏其地戰不勝營室衛

地大歷三年七月壬申五星並出東方占曰中國利
中國利則四夷被兵也貞元四年五月歲星熒惑鎮
星聚於熒室占曰其國亡地在衛分元和十一年十
二月鎮星太白辰星聚於危危齊分又十四年八月
歲星太白辰星聚於軫軫楚分占曰兵喪開成四年
正月熒惑太白辰星聚於南斗推歷度在燕分占曰
內外兵喪改立王公咸通中熒惑鎮星太白辰星聚
於畢昴在趙魏之分詔鎮州王景崇被袞冕軍府稱
臣以厭之文德元年八月歲星鎮星太白聚於張張

周分占曰内外有兵爲河內河東地大約星聚少則其用兵少星聚多則其用兵多天理人事有若符契焉或曰星變偶然耳隨變隨應未必然也或者之言非也姑以唐事驗之其大者有徵則其餘概可見矣太宗貞觀年中天下太平不聞有星聚之異天寶九年五星聚燕後數歲安史煽禍中國塗炭至累世不息是何得爲偶然哉

傳說奉中闈之祠原注李播大象賦 案李播淳風之父也 隋李播天文大象賦苗爲注平津館叢書錄

之並附跋一首

北斗七星翁注引漢書天文志杓端有兩星一內爲矛
招搖一外爲盾天蠡案史記天官書天蠡作天鋒
歷數

卽命歷序所謂孔子修春秋用殷歷也翁注唐一行曰
度議曰云云亦見文選陸佐公新刻漏銘注

十二相屬起於何時案楊升庵集第七十五卷子鼠
丑牛十二屬之說朱子謂不知所始余以爲此天地
自然之理非人能爲也日中有金雞乃酉之屬月中

有玉兔乃卯之屬日月陰陽互藏其宅也古篆巳字作蛇形亥字作豕形餘可推而知矣

分爲十紀 案盛如梓庶齋老學叢談上路史泰皇氏注春秋命歷云自開闢至獲麟二百二十七萬六千歲分爲十紀乾鑿度及春秋元命苞皆云二百七十六萬七千年廣雅因之均爲誕妄夫二十九萬一千八百四十歲而及太素冥莖此道之根本也嘗舉以問陳月觀先生云康節皇極經世書十二萬九千六百年只是此數帝堯卽位之年甲辰已在午

定之方中公劉之詩擇地之法也 案日知錄五七月
流火天文也相其陰陽地理也四矢反兮射也兩驂
如舞御也止戈爲武皿蟲爲壘書也千乘三去亥有
二首六身數也

困學紀聞補注卷九

困學紀聞補注卷十

清鄞張嘉祿肖菴著

男壽鏞校刊

地理

沈黎郡汶山郡地理志不載翁注引史記大宛傳於是置益州越巂牂牁沈黎汶山郡欲地接以前通大夏案李奇曰欲地界相接至大夏

非至秦始通也翁注引劉淵林注蜀王本紀惠王二十七年云云案史記秦本紀惠王十四年卒此云二

十七年疑誤惟昭襄王二十七年有因蜀攻楚黔中
三十年蜀守若伐取巫郡侯考
天不足西北地不滿東南 案河圖括地象曰西北爲
天門東南爲地戶注天不足西北是天門地不滿東
南是地戶

舜漁濩澤 案漢書地理志河東郡濩澤縣應劭曰有
濩澤在西北穆天子傳天子四日休於濩澤郭璞注
今平陽濩澤縣是也又元和郡縣志河東道下太平
寰宇記河東道下太平御覽州郡部九引墨子俱作

漢澤

奇章巴州之稱 案周李孝軌亦封奇章公

諸子

故爲金人三封其口曰古之慎言 案敬齋古今薈五

三緘其口者凡三處也古今人多以三緘連言之或

曰有金人焉三斷句則指三人也亦通

黃帝有巾机之法 案黃帝巾凡銘曰無掘壑而附邱

無舍本而治末日中必彗操刃必割執斧必伐日中

不彗是謂失時操刃不割是謂失利執斧不伐賊人

將來涓涓不塞將爲江河熒熒不救炎炎柰何兩葉
不去將用斧柯此銘漢以下文士多引用之而不見
其全惟見於兵書如此楊升庵集四十八卷

法言序舊在卷後司馬溫公集注始寘諸篇首 案雲

谷雜記三前輩讀書所嗜各不同司馬溫公酷好揚
子太元而作書疑詆孟子謂揚子真大儒孟與荀殆
不足疑自云少好其書研精竭慮歷年已多始敢爲
注每閱太元必屏絕人事讀必數十過其嗜之如是
而老蘇獨不喜揚子云雄之法言辨乎其不足問也

問乎其不足疑也求聞於後世而不待其有得君子
無取焉耳又曰雄於太元好奇而務深故辭多夸大
而可觀者鮮又曰使雄有孟軻之書而肯爲太元耶
二公所見不侔如此

蘇文忠論管仲之無後

案湛園札記卷三左傳君子

曰管仲之世祀也宜哉杜氏曰管仲之後於齊沒不
復見傳亦舉其無驗昨舉示友人閻子百詩爲予檢
史記傳注引世本云莊仲山產夷吾夷吾產武子云
云其十世皆有諡惟末世景子步耐生微無諡耳此

凡案閒書而杜孔諸君皆不及知亦可怪也

黃帝六相一曰蚩尤通鑑外紀改爲風后 案外紀云

風后明天道管子稱蚩尤者疑誤

馬氏
繹史

翁注后土

辨乎北方故使爲李 案襄牖閒評理李二字古通

用初無異義周語曰行理以節逆之管子云黃帝得

后土而辨於北方故使爲李以二書攷之則知左氏

傳中用行李字或作理初無異義

弟子職漢志附於孝經朱子謂疑是作內政士之子常爲

士因作此以教之 案朱子語類弟子職一篇若不

在管子中亦亡矣此或是他存得古人的或是他自作俱未可知竊疑是他作內政時士之子常爲士因作此以教之

文子者老子弟子也原注序曰亦曰計然姓辛名研字文子案辛文子號計研漢碑作盍研以計然文子合爲一人始於北魏李暹計然與文子截然兩人見下注及卷五三十三頁注宋葉大慶攷古質疑卷二第九頁辨之甚詳

夫子見老聃案今日見老子其猶龍邪見史記老莊

申韓列傳及論衡龍虛篇論衡知實篇

魯雞固能矣 案韓文公守戒曰賁育之不戒童子之不抗魯雞之不期蜀雞之不支今夫鹿之於豹非不魏然大矣然而卒爲之禽者爪牙之材不同猛怯之資殊也

向秀注莊子而郭象竊之郝紹作晉中興書而何法盛竊之 案明劉念臺人譜類記五南唐時隱者譚峭著有譚子化書後游建康見宋齊邱有神仙風格出其化書六卷授之曰是書之化其道無窮願子序之